



BAILENAN FOLKLORIKO

Como bailenan folkloriko nos lo por menciona e siguiente sorto di bailenan: tamboe, tumba, danza, wals, mazurka i quadrilla.

E bailenan aki a wordo treci pa e esclavonan y e kolonialistanan, kende tempo ku nan a bin aki, a trece huntu ku nan nan cultura. Solamente di e tumba nos por bisa ku e ta di origen antiyano ya ku e tumba a nace for di e tamboe.

TAMBOE. E baile di tamboe ta di origen afrikano. E ta un baile ku a wordo treci door di e esclavonan. Nos konoce dos sorto di baile di tamboe: tamboe di señorita i tamboe di tarai of tamboe di sanca.

Na un tamboe di señorita tur cos ta bai netchi i decente. Durante e baliamento e heer no mag di mishi ku e dams i e damsnan ku bini na e baile aki, tur ta wordo akompanja pa un tanta of un otro miembro di famia di edad ya avansa.

Na un tamboe di tarai e baile ta sosode ariba un manera menos decente.

Durante e baile aki e parehanan no ta bisti ku panja, pero nan lora papel rond di nan kurpa. Ta klaro ku e papel ta kede hente i na un dado momento e parehanan ta completamente sunu.

Hopi biaha e baile ta termina ku un pelea i ku matamento.

TUMBA. E tumba a nace for di e tamboe. Esaki a sosode tempo ku e shonnan a prohibi e baile di tamboe pasobra nan tawata pensa ku e baile aki tin di haber ku podernan misterioso.

E esclavonan ku awor no tin nada di haci mas anochi a dicidi di inventa algo di moda cu toch nan por sigi expresa nan mes riba un of otro manera. Nan a cambia e ritmo di tamboe i di e manera aki nos tumba a nace. Pa e musika aki nan tawata usa como instrumento e bastel. Prome te e esclavonan so tawata balia e tumba. Despues e shonnan tambe a kuminsa balia esaki.

DANZA. Esaki ta un baile ku poko poko ta desapareciendo. Tokante e origen di e danza e opinionnan ta diferente, pasobra tanto na Cuba como na Puerto Rico nan konose e tipo di baile aki.

WALS. E baile aki a wordo treci door di e europeanonan. Su origen ta di Austria. E wals antiyano ta wordo toka i balia diferente ku esun di Europa.

Hopi tempo pasa nan tawata organisa competencia di wals. Esaki tawata tuma lugar den casnan di torto. Durante e baliamento e parehanan mester purba di hinka otro den un hoeke. Ora esaki sosode, e pareha ku a wordu hinka den hoeke mester bandona e pista di baile. E pareha ku keda ultimo riba pista ta e ganador.

Mensionando e palabra wals, hopi di nos lo pensa mesora riba nos caha di orgel i tambe riba personanan manera Padu del Cariba i Rufo Wever.

MAZURKA. Su origen ta europeo. E ta e baile nacional di Polonia.

Mazurka tawata un baile di salon ku tawata wordo balia solamente door di e shonnan. Loke nos por bisa tambe ta ku tin tin tiki diferencia den e manera ku nan ta balia e mazurka na Aruba i manera nan ta balié na Corsow.

Por ehempel nos por menciona ku na Corsow nan konose e 'Pia di Kater of Kabra' y na Aruba no.

QUADRILLA. Esaki ta un baile ku su origen ta di Francia. Pa por balia e quadrilla tin mester di cuater pa ocho pareha. E quadrilla ta wordo guia door di un persona ku ta wordo jama: Cavalier - conducteur. Esaki ta e persona ku ta duna komando, i e parehanan tin ku kumpli ku e komandonan. Esaki ta wordo haci na frances. Algo ku ta si sumo importancia den e quadrilla ta e formashon den cual e parehanan mester baila.